



Ақмешіт

11 ақпан
сенбі

№12 (1919)

2023 жыл

апталығы

Газет
1994 жылдың 15 сәуірінен
бастап шығады

Қалалық қоғамдық-саяси әлеуметтік-
ақпараттық тарихи-танымдық газет •
E-mail: akmeshit.kz@mail.ru

Облыс әкімі Нұрлыбек Нәлібаев Сыр өңіріне жұмыс сапарымен келген «ҚазМұнайГаз» ҰК» АҚ Басқарма төрағасы Мағзұм Мырзағалиевпен бірге өңірдегі мұнай кен орындарын аралады.

АЙМАҚТА ЖАҢА КЕН ОРЫНДАРЫ ІЗДЕСТІРІЛМЕК



Аймақ басшысы мен Мағзұм Мырзағалиев Ақшабулак кен орнында болып, «Торғай-Палеозой» жобасының жүзеге асырылу барысымен танысты. Алдағы уақытта «Торғай Палеозой» барлау алаңында 5 мың метрден астам тереңдікте көмірсутек шикізатына геологиялық барлау жұмыстарын жүргізу жоспарлануда. Қазіргі таңда аймақта мұнай өндіру технологияларын жетілдіру және жаңа кен орындарын барлау-ізвестіру жұмыстары қолға алынбақ.

Республикалық бюджет есебінен Шу-Сарысу және Арал бассейндерінде геологиялық-геофизикалық зерттеу жұмыстары жүргізілуде. Сонымен қатар Сырдария шөгінді бассейнінде зерттеуге республикалық бюджеттен қаражат бөлуі сұрады.

Айта кетейік, аралау барысында «ҚазМұнайГаз» ҰК» АҚ Басқарма төрағасы мұнай компанияларындағы жұмысшылардың әлеуметтік жағдайы мен жаңа кен орындарын барлау бойынша өңірде атқарылып жатқан жұмыстарға оң бағасын берді.

Сондай-ақ аймақ басшысы мен ұлттық компания басшысы Құмқол кен орнындағы мұнай барлау жұмыстарының негізін салған қайраткер Мұрат Саламатовтың ескерткіш бюстіне гүл шоғын қойды. Кен орнындағы өндірістік нысандардың жұмысымен танысты.

Өңірдегі жұмыс сапары аясында Мағзұм Мырзағалиев Т.Есетов атындағы №264 мектеп-лицейінде аймақ мектептеріне «National Geographic» журналына жазылуға сертификаттар табыстады. Ғылым әлемінде танымал басылым география, табиғат, тарих, ғылым және мәдениет туралы ақпараттық-танымдық материалдарды қамтиды. Оқушылардың ақыл-ой қабілеттерін дамытуға мүмкіндік береді.

ЖЕТІ ПАРТИЯНЫҢ ҮКІЛЕГЕН ҮМІТІ БАР

8 ақпан күні алдағы сайлауға үміткерлерді ұсыну аяқталды. Бұл сайлауға үкілеген үмітін сайлаған партиялар қатары аз емес. Жеті бірдей партия алдағы сайлауда бақ сынамақ. Сондай-ақ депутат болғысы келетіндер аз емес.



Орталық сайлау комиссиясының дерегі бойынша Мәжіліс пен мәслихат сайлауына барлығы 14207 үміткер ұсынылған. Оның 1754-і партиялық тізіммен, қалған 12 453 адам бір мандаттық округтар бойынша сайлауға түспек. Мәжіліс сайлауына 7 партиядан 283 үміткер 69 мандат үшін бәсекеге түседі.

«8 ақпан күні сағат 18-00-де барлық өңірде Парламент Мәжілісі мен мәслихаттар депутаттығына кандидаттарды ұсыну аяқталды. Орталық сайлау комиссиясы сайлауға барлық 7 саяси партияны жіберді. Саяси партия партияға мүше болмаған тұлғаны тізімге қосуға құқығы жоқ екендігін еске салғым келеді. Партиялық тізімге қосылған тұлғалар саны саяси партиялар арасында бөлінетін депутаттық мандаттың белгіленген санынан 30 пайызға асып кетпеуі тиіс. Бұл ары кеткенде 90 адам, одан төмен де болады. Партиялар партиялық тізім саны қанша болатындығын дербес анықтады», – деп жариялады

Орталық сайлау комиссиясы төрағасының орынбасары Константин Петров.

Бұл сайлауда мәслихат депутаттығына тартыс қыза түседі деген болжам бар. Себебі жергілікті мәслихаттарда бір орынға 4,3 үміткерден түсуде. Тағы бір айта кетерлігі, Жалпыұлттық социал-демократиялық партиясы мәслихат сайлауына қатысудан бас тартқан. Бұл партия негізгі күшті Мәжіліске бағыттағанын да жасырмады. Қалай айтқанда да бұл сайлау тартысты өтетін сияқты.

Сонымен, Мәжіліс сайлауына 7 саяси партия қатысады. Оның ішінде партиялық тізім арқылы «Қазақстан халық» партиясынан – 52, «Ақ жол» партиясынан – 54, «Жалпыұлттық социал-демократиялық» партиясынан – 19, «Байтақ» жасылдар партиясынан – 18, «Ауыл» партиясынан – 25, «Respublica» партиясынан – 25, «AMANAT» партиясынан – 90 кандидат ұсынылған.

Г.ДІЛДӨБЕКОВА

Қасиетті қара жер – адам баласын кие тұтатын ең қадірлі мекен. Адамның кіндігі де, тірлігі де Жер-Анамен байланысты. Жерден өзге аймақта, басқа планетада адамдар өмір сүре алмайды. Ғалымдар қанша зерттесе де тіршілікке жерден лайықты планета таба алмады. Жер-Анамыз ашулы секілді. Ол мінез көрсетіп, ақпанда алапат болып, жер сілкінді. Зардабы да ауыр. Бауырлас Түркиядағы жер сілкінісі оның зардабы қаншалықты ауыр болатынын көрсетті.

ДҮМПУІҢДІ ТОҚТАТҚЫ, ЖЕР-АНА!

Зілзаладан зардап шеккен Түркия һәм Сергелдеңге түскен Сирия

Дәл қазір алыстағы түрік ағайындар қатты киналуда. Алапат зілзала бірнеше мың адамның өмірін жалмады. Мыннан аса ғимарат қирады. Құтқарушылар қираған ғимараттар мен үйіндіге айналған тұрғын үйлердің арасынан адамдарды шығаруда. Сириядағы жағдай да мез емес. Өкінішке орай қайтыс болғандардың саны күн санап артып отыр. Төтенше жағдайлар мен



апаттар жөніндегі басқарманың (AFAD) мәліметіне сүйенсек, 6 ақпан күні Кахраманмараш-Пазарджик ауданында 7,7 баллдық және Эльбистанда 7,6 баллдық жер сілкінісі болған. Бұл аздай 648 афтершок болған дейді мамандар. Афтершок дегенді соқкының қайта қайталануы деп түсіндіруге болады. Бірақ оның әсері алғашқыдан әлдеқайда төмен. Дегенмен алапат жер сілкінісінен кейін 600-ден астам афтершок болса ондағы ғимараттар үйіндіге айналмағанда қайтсын... Жерасты дүмпуі Түркияның 10 провинциясында, сондай-ақ көршілес елдерде, соның ішінде Сирияда сезілген. Түркия Президенті Режеп Ердоған 10 провинцияда 3 айға төтенше жағдай режимін енгізіп, ел көлемінде 7 күндік аза тұту жариялады. Ол твиттердегі парақшасына: «Елімізде 2023 жылдың 6 ақпанында болған жер сілкінісіне байланысты 7 күндік ұлттық аза тұту жарияланды. Туымыз 2023 жылдың 12 ақпаны, жексенбі күні, барлық елімізде және шетелдік өкілдіктерде күн батқанға дейін жартылай тік көтеріледі», – деп жазды.

«Анадолы агенттігінің» мәліметіне сүйенсек, Түркияда жер сілкінісіне қаза болғандар саны 12 мыңнан асқан. Бұл – Қазақстан уақытымен 9 ақпанның таңындағы ақпар. Төтенше жағдайлар мен апаттар жөніндегі басқарманың (AFAD) мәліметінше, Кахраманмараштағы зілзала салдарынан 12391 адам көз жұмса, 62914 адам жарақат алған. ҚазАқпарат агенттігі халықты орналастыру үшін 70818 шатыр тігілгенін мәлімдеді. Соңғы мәліметтер бойынша Түркия мен Сирияда зілзаладан қайтыс болғандардың саны 20 мыңнан асқан. Өкініштісі, қаза тапқандардың саны сәт санап артып келеді.

Сирияда да зілзала салдарынан мыңдаған адамның қаза тапқаны белгілі болды. Бұл елдің де жағдайы мез емес. Сергелдеңге түскен Сирия да көмекке мұқтаж.

Біз қанша жерден технология дамыған ХХІ ғасырда өмір сүріп жатырмыз десек те әлі күнге дейін зілзала туралы алдын ала нақты болжам жасау мүмкін емес. Тіпті мұндай табиғи апаттың дәл қай күні, қай сағатта болатынын сейсмология ғылымының өзі нақты айта алмай отыр. ДДСҰ бағалауы бойынша зілзаладан зардап шеккен аумақтарда барлығы 23 миллионнан астам халық тұрады екен. Бұл ұйым қаза тапқандар саны 20 мыңнан асуы мүмкін екенін ескертіп отыр. Негізі Түркияда жер сілкінісі жиі болады. Бірақ 6 ақпандағы зілзала апатты болып тұр. Қолда бар деректерге сүйенсек, құтқару жұмыстарына 10 мыңнан астам адам жұмылдырылған. Президент Ердоған бұл зілзаланы 1939 жылдан кейін қайталанған аса ірі табиғи апат деп атады. Зілзала зардабы Грузия, Армения, Ливан, Иранда сезілген. Кейіннен Анкара қаласында да қуаттылығы мұнан төмен жерасты дүмпуі болған. Тіпті 8 ақпанда Түркияның онтүстігінде қуаттылығы 5,4 баллдық жер сілкінісі тіркелген. 2 БЕТТЕ

18 СЕКУНД: ҮЛГЕРГЕН АЛАДЫ, ҮЛГЕРМЕГЕН ҚАЛАДЫ

Ақпан басталғалы көп талқыланған тақырыптың бірі осы болды. Әсіресе 18 секундта арнайы сайтқа өтінім беріп үлгеру жайы көпшіліктің күмәнін туғызды. Сонымен, бәрін басынан бастайық.



Алтыншы ақпан күні арнайы іске қосылған сайтта жеңілдетілген автонесиге өтінім қабылдау басталды. Дәл осы күнді зарыға күтіп, мойын созып жүрген көпшіліктің өтінім беру сәті бар болғаны 18 секундта аяқталды. Бар мәселе де осында. 18 секундта 761 адамның өтінім беріп үлгеруіне күмәнін қарағандар аз емес. Тіпті әлеуметтік желінің барлығында 18 секундты талқылағандар қатары аз болмады. 2 БЕТТЕ

Қаладағы С.Лапин атындағы № 261 мектепте «Лапин шоу» оқушылар театры құрылған болатын. Қазіргі уақытта жаңа жоба өз нәтижесін беріп, оқушылар сахнада өнер көрсетуде.

ТЕАТРЫ БАР МЕКТЕП



Ресми ақпаратқа сүйенсек, сол күні арнайы сайтқа 125 мың қолданушы кірген. Алайда берілетін несие саны шектеулі. Яғни 761 адам өтініш берген кезде кезекке тұрғандар саны толып қалып, көзді ашып-жұмғанша, 18 секундта аяқталған.

Театр жобасын енгізудегі мақсат – оқушылардың шығармашылығын дамыту, адамгершілікке тәрбиелеу, баланың сөйлеу мәнерін жақсарту, көпшілік алдында өзін ұстай білуіне, жан-жақты дамуына ықпал жасау. «Лапин шоу» оқушылар театры құрылғанда алғашқы 5-9 сыныптар аралығында балаларға «Кастинг – 2021» жарияланды. Осылайша театрға талантты, өнерлі шәкірттерді қабылдадық. Әрбір баланың мүмкіндігін жетілдіру мен жақсартудың жолдарын іздеуде жұмыс істеп жатырмыз. Әр оқушының мақсатқа жетуіне көмектесеміз, – дейді С.Лапин атындағы №261 орта мектептің педагог-ұйымдастырушысы Шолпан Күздеубай. 3 БЕТТЕ

